

Von de Kerb unn emm ahle Exe-Exe

Omm letzde Mittwoch hadd mich dess Kättche gonz uffgereecht oogerufe. Honnes, hottse omm Telefon gepischbert unn hott e bissi debei geflennt, de Schorsch der reescht mich ewe widder uff, dess glaabsde nitt. Wenn der su weidermächt loss ich mich noch scheid, nooch zwaaunfuffzisch Johr, die merr verheirat sinn.

Ich habb gelacht. Kättche, was hosde dann? – erzähl merr emol.

Doo sät se: Ei de Schorsch. Stell derr doch emol vor, der iss vorgestern moie uffem Speicher erumgekrawwelt unn hott soi Kerweborschkapp unn die Schärp gesucht, unn weiler se nitt gefunne hott bin ich aach noch hinnerher unn habbse aus de Kist gehollt, in die merr die Sache vor iwwer verrzisch Johr, wie merr ferdisch gebaut hadde, enoigedue hawwe. Wenn ich gewusst hädd was der will hädd ich gesaat, ich waaß nitt wo der Krempel iss, den hosde doch schunn fortgeschmisse, wie merr vor siwwe Johr de Speicher uffgeroomt hawwe, unn doo hätt's Ruh gewwe. Ich doll Dippe such dess Zeich eraus unn jetz hawwe merr schunn zwaa Daach Krach.

No, saach ich, Kättche, warum habbder donn Krach?

Doo sät se: De Schorsch hott in de Zeidung gelese, dass beim Umzuuch von de Kerweborsch aach die Exe unn die Exe-Exe mettmache unn doo hotter gesaat, er wär vor achtunfuffzisch Johr Ex-Kerweborsch gewese, wär also aach enn Exe-Exe unn desdeweeseche wollder beim Zuuch mettmache. Unn weil die Kapp nimmi basst soll ich se ufftrenne unn enn Dorschziehgummi enoimache, stell derr doch emol vor! Dann hotter aach noch die Fohn gesucht, awwer die hawwe mir nitt, Gottseidonk. Der ahle Kerl mett soim dicke Bauch unn mett soiner Glatz will also hinner dene Buwe herlaafe, unn ich soll aach noch irschendwo uff de Gass stehe unn soll Hall die Gail rufe.

Ich musst lache. Kättche, mir hawwe doch Kerb unn koo Fassenacht.

Doo hottse widder e bissi geflennt. Ach Honnes, ich bin so dorschenonner, konnsde merr nitt helfe?

Doch, habb ich gesaat unn habbere sozesaache dorschs Telefon was ins Ohr geflistert.

Omm Kerwemondaach hott michs Kättche widder oogerufe. Honnes, hottse ins Telefon gekrische, dess war enn Mordstipp, vom Exe-Exe war gestern nix mehr ze heern.

Ich frooch: Hosdes also so gemacht wie ich derr dess gesaat habb?

Ja, hottse ze Antwort gewwe, ich habb bis Freidaachowend gewart unn donn zum Schorsch gesaat, Schorsch, wennde jetzt Exe-Exe bist, mussde aach donze, und weil mir schunn long nimmi gedonzt hawwe, fonge mir gleich mett de erst Donzstund oo. Er war gleich Feier unn Flomm unn dann hawwe mir de Radio oogemacht unn hawwe in de Wohnstubb so e Stund long gedonzt unn omm Somsdaachowend dann nochemol unn e Stund long. Omm Sunndaachmoie, alser soi Schärp umbinne unn soi Kapp uffsetze wollt hotter sich gleich widder hiegesetzt unn gesaat: Ich habb von der Donzerei so enn Muskelkater, ich kann joo nimmi uff de Fieß stieh unn schunn garnitt mettem Zuuch mettlaafe, holl emol die gelb Tub eraus unn reib merr die Boo unn de Buckel oi. Ich habben oigeriww, er hott als geautscht unn gejommert unn iss schee dehoom uff de Kautsch gebliww. Unn die Schärp unn die Kapp soll ich widder uff de Speicher due, weil enn Exe-Exe nitt nor mettem Zuuch mettlaafe dut, der misst joo aach später noch donze unn dess kennder halt nimmi.

No ja, saach ich unn lach debei, donn iss doi Eh joo gerett.

Eiern Honnes